

Rosabelle Illes artista

Proyecto di Sexual Right ta sumamente positivo



ORANJESTAD – E aña aki un biaha mas Famia Planea ta conta cu artistanan conoci aki na Aruba pa yuda nan cu proyectonan cu tin. Srta. Rosabelle Illes kende ta un artista conoci, lo ta yudando cu un di e fundacion su proyecto pa dia 24 di november proximo.

“Pa mi ta un honor pa ta parti di Famia Planea e aña aki cu nan proyecto cu e declaracion di ‘Sexual Rights’ cu mi ta haya sumamente positivo,” Srta. Illes a indica. E proyecto aki lo wordo traduci na papiamento y lo wordo lansa dia 24 di november proximo. Segun Srta. Illes, e proyecto aki lo wordo lansa na un manera unico. “Mi ta kere cu cualkier abogado of hues lo ta di acuerdo cu mi si nos sinta lesa tur e derechonan e anochi ey

cu tur hende lo pega soño,” el a indica.

E fundacion hunto cu e artista lo trece dilanti e proyecto aki na un manera diferente. Lo haci uzo di arte, poesia y teatro pa asina pasa door di tur e 10 derechonan cu tin. Ta super importante pa tur hoben sa di e derechonan aki, pero tambe comunidad en general. Asina aki por mehora e situacion no solamente na Aruba, pero pa e isla bira un ehempel pa tur esunnan eyfo unda cu aki ta wordo respeta curpa di otro, incluso respeta otro como humano.

“Pues pa mi e ta un honor pa ta e lider di e parti aki, unda mi ta bay trece e derechonan aki na un manera creativo,” Srta. Illes a indica. Pa cu e campaña di I Love My Body e aña aki nan lo bin cu un concepto diferente. Den e

concepto aki nan lo explora e diferencia entre “Love your body” y “Like your body.” Si mira realisticamente tin parti di cada persona su curpa cu e persona mes no ta gusta, pero asina mes ta stima esaki. Un ehempel cu Srta. Illes a duna ta si su horea ta di para taxi asina mes e ta stima esaki pasobra e mester di dje pa por scucha.

E concepto aki ta loke e fundacion hunto cu e artista lo trata durante e campananan di I Love My Body. Lo por mira personanan grandi y chikito, publico, hoben, den ki ramo un hende por ta. Lo bay tin tur parti di curpa cu un hende kisas no gusta, pero ta stima nan si. E idea aki lo wordo treci dilanti pa reenforza pa asina cada hende stima nan mes un curpa y loke ta stima completo. □